



71-A HISPANA KONGRESO DE ESPERANTO

ALMAGRO, 27-a de aprilo ĝis 1-a de majo 2012

UNUA ANONCO

LA KONGRESO

Esperantista Kastili-Manĉa Asocio (EMAS), en kunlaboro kun Hispana Esperanto-Federacio, invitas vin al la partopreno en la 71a Hispana Kongreso de Esperanto kiu okazos de la 27-a de aprilo ĝis la 1-a de majo de la jaro 2012 en la urbo Almagro.

La baza sidejo de la kongreso estos la Palaco de la Grafo de Valdeparaíso, konstruaĵo de la 18-a jarcento, nuntempe kulturejo de la provinca deputitejo el Ciudad Real, kiu disponas je ĉiuj necesaj eroj por la okazigo de la kongreso: salonoj, kunvenĉambroj, ripozejoj, kaj ankaŭ de loĝeblecoj (en limigita kvanto)

LA MOTIVO

La kongreso havos kiel bazan motivon la 125-an datrevenon de la naskiĝo de Esperanto, kaj ĝia moto estos **“Esperanto: 125 años derribando fronteras / 125 jaroj faligante limojn”**

LA URBO

Almagro estas urbeto en la provinco Ciudad Real, ĉe la aŭtonoma komunumo Kastilio-Manĉo en Hispanio. Ĝi havas ĉirkaŭ 9.000 enloĝantojn.

La urbo konservas pitoreskan historian centron, multajn artajn metiejojn kaj estas loko ofte vizitata de turistoj. Unu el la plej famaj allogaĵoj estas la teatrejo aŭ kortoteatro (*corral de comedias* aŭ komedikorto laŭ la klasika nomigo), la nura teatrejo en Hispanio kiu restas senŝanĝa ekde la 17a jarcento; la ĉefa eco estas ke temas pri sentegmenta teatrejo. Dua allogaĵo estas la nekutima centra placo, tute malsimilaj al tiuj ĉe la regiono Manĉo kaj fasonita laŭ la nordeŭropa maniero. Tria allogaĵo estas gastronomio.

Almagro fariĝas referenco pri teatro kaj kulturo en la regiono per la Internacia Festivalo pri Teatro, kulturaj kaj turismaj aktivaĵoj. Nuntempe, Almagro prezentis sian kandidatecon al Monda Heredaĵo de Unesko.



LA KONGRESA KOMITATO

Prezidanto: Jesús García Cano

Sekretario: Miguel Hernández

Kasisto: Raúl Martínez

Kunlaborantoj: Pablo Busto, Fernando Martínez

LA PROGRAMO

La organiza komitato nun pretigas programon, kiun oni konkretigos en venontaj informoj.

En la programo ni donos atenton al la datreveno de la lingvo Esperanto, per diversaj celebradoj. Tio ankaŭ estos kialo por konigi nian lingvon al la loĝantaro de Almagro kaj la ĉirkaŭaĵoj.

Parto de la kulturaj programeroj fokusiĝos sur la celebrado de la 20-a de la firmiĝo de la Ibera Skolo de literaturo en Esperanto. Ni atendas la partoprenon de bona parto de tiu verkista grupo.

Ne mankos rilato al Donkiĥoto, kaj konigado de la regiono.

Ni esperas doni specialan rolon al la teatro, akorde kun la tradicio de la gastiganta urbo.

Ankaŭ ne mankos muzikaj prezentadoj, prelegoj, atelieroj, ludoj, distraĵoj kaj vizitoj.

TURISMA PROGRAMO KAJ POSTKONGRESO

Dum la kongreso, partoprenantoj havos la okazon koni la urbon Almagro, mirindaĵon de la malnova kastilia arkitekturo, kun ties Ĉefplaco, nobelaj domoj, palacoj, monaĥejoj kaj muzeoj, kaj speciale kun ĝia *Teatrokorto*.

Estas antaŭvidataj ekskursoj al la ĉirkaŭaĵoj, inter kiuj la impona Kastelo de Calatrava.

Oni programos turisman Postkongreson la 2-an de majo, por tiuj kiuj povos plilongigi sian ĉeeston en la regiono.

GASTIGADO KAJ TRANSPORTO

La Kongreso disponos je diversaj ĉambroj en la Palaco de Valparaíso, kie eblos tranokti. La prezo de la individua gastigado en duobla ĉambro estos 60 eŭroj por kvar noktoj. ATENTU: Ĉar la nombro estas limigita, la rezervo estos farita laŭ strikta ordo de petado.

Ekzistas krome pluraj hoteloj, de diversaj kategorioj, en la urbo. En venontaj informiloj oni prezentos nomojn, adresojn kaj specialajn prezojn kiujn ni ankoraŭ intertraktas.

Tuj apud la urbo ekzistas komforta kampadejo, je tre favora prezo, kun spaco por tendoj kaj ankaŭ kun ĉambroj.

Por alveni, ekzistas trajnstacio en la urbo, kun rektaj trajnoj interalie el Madrido kaj Barcelono. Ankaŭ ekzistas busstacio, kun aŭtobusoj el Madrido kaj diversaj kastilimanĉaj urboj.

Estas planite fari komunan transporton de la stacidomo de la AVE (rapidtrajno) en Ciudad Real, je difinitaj horoj vendrede vespere, sabate matene (se necese) kaj returne marde vespere.

